



儀禮篇目

士冠禮第一

士昏禮第二

士相見禮第三

鄉飲酒禮第四

鄉射禮第五

燕禮第六

大射禮第七

聘禮第八



儀禮
公食大夫禮第九

親禮第十

喪服第十一

士喪禮第十二

既夕禮第十三

士虞禮第十四

特牲饋食禮第十五

少牢饋食禮第十六

有司第十七

儀禮卷一

士冠禮

筮于廟門主人玄冠朝服緇帶素鞶卽位于門
東西面有司如主人服卽位于西方東面北上
筮與席所卦者具饌于西塾布席于門中闌西
闌外西面筮人執筮抽上韝兼執之進受命於
主人宰自右少退贊命筮人許諾右還卽席坐
西面卦者在左卒筮書卦執以示主人主人受
眡反之筮人還東面旅占卒進告吉若不吉則

筮遠日如初儀徹筮席宗人告事畢主人戒賓
賓禮辭許主人再拜賓答拜主人退賓拜送前
期三日筮賓如求日之儀乃宿賓賓如主人服
出門左西面再拜主人東面答拜乃宿賓賓許
主人再拜賓答拜主人退賓拜送宿贊冠者一
人亦如之厥明夕爲期于廟門之外主人立于
門東兄弟在其南少退西面北上有司皆如宿
服立于西方東面北上擯者請期宰告曰質明
行事告兄弟及有司告事畢擯者告期于賓之

家夙興設洗直于東榮南北以堂深水在洗東
陳服于房中西墉下東領北上爵弁服纁裳純
衣緇帶鞅鞞皮弁服素積緇帶素鞞玄端玄裳
黃裳雜裳可也緇帶爵鞞緇布冠缺項青組纓
屬于缺緇纒廣終幅長六尺皮弁笄爵弁笄緇
組紘纁邊同篋櫛實于篔簹筵二在南側尊一
甒醴在服北有篚實勺觶角柶脯醢南上爵弁
皮弁緇布冠各一匱執以待于西坫南南面東
上賓升則東面主人玄端爵鞞立于阼階下直

東序西面兄弟畢衿玄立于洗東西面北上擯者玄端負東塾將冠者采衣紒在房中南面賓如主人服贊者玄端從之立于外門之外擯者告主人迎出門左西面再拜賓答拜主人揖贊者與賓揖先入每曲揖至于廟門揖入三揖至于階三讓主人升立于序端西面賓西序東面贊者盥于洗西升立于房中西面南上主人之贊者筵于東序少北西面將冠者出房南面贊者奠纚笄櫛于筵南端賓揖將冠者將冠者即

筵坐贊者坐櫛設纚賓降主人降賓辭主人對賓盥卒壹揖壹讓升主人升復初位賓筵前坐正纚與降西階一等執冠者升一等東面授賓賓右手執項左手執前進容乃祝坐如初乃冠興復位贊者卒冠者興賓揖之適房服玄端爵鞞出房南面賓揖之卽筵坐櫛設笄賓盥正纚如初降二等受皮弁右執項左執前進祝加之如初復位贊者卒紘興賓揖之適房服素積素鞞容出房南面賓降三等受爵弁加之服纁裳

儀禮卷一
三
韎韐其他如加皮弁之儀徹皮弁冠櫛筵入于房筵于戶西南面贊者洗于房中側酌醴加櫛覆之面葉賓揖冠者就筵筵西南面賓受醴于戶東加櫛面枋筵前北面冠者筵西拜受解賓東面答拜薦脯醢冠者卽筵坐左執解右祭脯醢以櫛祭醴三興筵未坐啐醴建櫛興降筵坐奠解拜執解與賓答拜冠者奠解于薦東降筵北面坐取脯降自西階適東壁北面見于母母拜受子拜送母又拜賓降直西序東面主人降

復初位冠者立于西階東南面賓字之冠者對賓出主人送于廟門外請醴賓賓禮辭許賓就次冠者見於兄弟兄弟再拜冠者答拜見贊者西面拜亦如之入見姑姊如見母乃易服服玄冠玄端爵鞞奠摯見於君遂以摯見於鄉大夫鄉先生乃醴賓以一獻之禮主人酬賓束帛僮皮贊者皆與贊冠者爲介賓出主人送于外門外再拜歸賓俎若不醴則醮用酒尊于房戶之間兩甒有禁玄酒在西加勺南枋洗有筐在西

南順始加醮用脯醢賓降取爵于筐辭降如初
卒洗升酌冠者拜受賓答拜如初冠者升筵坐
左執爵右祭脯醢祭酒與筵末坐啐酒降筵拜
賓答拜冠者奠爵于薦東立于筵西徹薦爵筵
尊不徹加皮弁如初儀再醮攝酒其他皆如初
加爵弁如初儀三醮有乾肉折俎齊之其他如
初北面取脯見于母若殺則特豚載合升離肺
實于鼎設扃鼎始醮如初再醮兩豆葵菹羸醢
兩籩栗脯三醮攝酒如再醮加俎齊之皆如初

齊肺卒醮取籩脯以降如初若孤子則父兄戒
宿冠之日主人紛而迎賓拜揖讓立于序端皆
如冠主禮於阼兄拜北面于阼階上賓亦北面
于西階上答拜若殺則舉鼎陳于門外直東墜
北面若庶子則冠于房外南面遂醮焉冠者毋
不在則使人受脯于西階下戒賓曰某有子某
將加布於其首願吾子之教之也賓對曰某不
敏恐不能共事以病吾子敢辭主人曰某猶願
吾子之終教之也賓對曰吾子重有命某敢不

從宿曰某將加布於某之首吾子將莅之敢宿
賓對曰某敢不夙興始加祝曰令月吉日始加
元服棄爾幼志順爾成德壽考惟祺介爾景福
再加曰吉月令辰乃申爾服敬爾威儀淑慎爾
德眉壽萬年永受胡福三加曰以歲之正以月
之令咸加爾服兄弟具在以成厥德黃耇無疆
受天之慶醴辭曰甘醴惟厚嘉薦令芳拜受祭
之以定爾祥承天之休壽考不忘醮辭曰旨酒
既清嘉薦宜時始加元服兄弟具來孝友時格

永乃保之再醮曰旨酒既濟嘉薦伊脯乃申爾
服禮儀有序祭此嘉爵承天之祐三醮曰旨酒
令芳邊豆有楚咸加爾服肴升折俎承天之慶
受福無疆字辭曰禮儀既備令月吉日昭告爾
字爰字孔嘉髦士攸宜宜之于假永受保之曰
伯其甫仲叔季唯其所當屨夏用葛玄端黑屨
青絢纒純純博寸素積白屨以魁柎之緇絢纒
純純博寸爵弁纁屨黑絢纒純純博寸冬皮屨
可也不屨總屨記冠義始冠緇布之冠也太古

儀禮卷一
冠布齊則緇之其綏也孔子曰吾未之聞也冠而敝之可也適子冠於阼以著代也醮於客位加有成也三加彌尊諭其志也冠而字之敬其名也委貌周道也章甫殷道也毋追夏后氏之道也周弁殷冔夏收三王共皮弁素積無大夫冠禮而有其昏禮古者五十而后爵何大夫冠禮之有公侯之有冠禮也夏之末造也天子之元子猶士也天下無生而貴者也繼世以立諸侯象賢也以官爵人德之殺也死而謚今也古

者生無爵死無謚

儀禮卷二

士昏禮

下達納采用鴈主人筵于戶西西上右几使者
 玄端至擯者出請事入告主人如賓服迎于門
 外再拜賓不答拜揖入至于廟門揖入三揖至
 于階三讓主人以賓升西面賓升西階當阿東
 面致命主人阼階上北面再拜授于楹間南面
 賓降出主人降授老鴈擯者出請賓執鴈請問
 名主人許賓入授如初禮擯者出請賓告事畢

傳禮 卷二
入告出請醴賓賓禮辭許主人徹几改筵東上
側尊甒醴于房中主人迎賓于廟門外揖讓如
初升主人北面再拜賓西階上北面向答拜主人
拂几授校拜送賓以几辟北面設于坐左之西
階上答拜贊者酌醴加角柶面葉出于房主人
受醴面枋筵前西北面賓拜受醴復位主人阼
階上拜送贊者薦脯醢賓卽筵坐左執觶祭脯
醢以柶祭醴三西階上北面坐啐醴建柶興坐
奠觶遂拜主人答拜賓卽筵奠于薦左降筵北

面坐取脯主人辭賓降授人脯出主人送于門
外再拜納吉用鴈如納采禮納徵玄纁束帛儷
皮如納吉禮請期用鴈主人辭賓許告期如納
徵禮期初昏陳三鼎于寢門外東方北面上
其實特豚合升去蹄舉肺脊二祭肺二魚十有
四腊一肫髀不升皆飪設扃鼎設洗于阼階東
南饌于房中醢醬二豆菹醢四豆蕪巾之黍稷
四敦皆益大羹湑在爨尊于室中北牖下有禁
玄酒在西綌冪加勺皆南枋尊于房戶之東無

儀禮 卷二
玄酒篚在南實四爵合巹主人爵弁纁裳緇袍
從者畢玄端乘墨車從車二乘執燭前馬婦車
亦如之有祫至于門外主人筵于戶西西上右
几女次純衣纁衽立于房中南面姆纁笄宵衣
在其右女從者畢衿玄纁笄被纁黼在其後主
人玄端迎于門外西面再拜賓東面答拜主人揖
入賓執鴈從至于廟門揖入三揖至于階三讓
主人升西面賓升北面奠鴈再拜稽首降出婦
從降自西階主人不降送壻御婦車授綏姆辭

不受婦乘以几姆加景乃驅御者代婿乘其車
先俟于門外婦至主人揖婦以入及寢門揖入
升自西階媵布席于奧夫入于室卽席婦尊西
南面媵御沃盥交贊者徹尊幕舉者盥出除幕
舉鼎入陳于阼階南西面北上七俎從設北面
載執而俟七者逆退復位于門東北面西上贊
者設醬于席前菹醢在其北俎入設于豆東魚
次腊特于俎北贊設黍于醬東稷在其東設清
于醬南設對醬于東菹醢在其南北上設黍于

腊北其西稷設湑于醬北御布對席贊啟會卻于敦南對敦于北贊告具揖婦卽對筵皆坐皆祭祭薦黍稷肺贊爾黍授肺脊皆食以湑醬皆祭舉食舉也三飯卒食贊洗爵酌醕主人主人拜受贊戶內北面答拜醕婦亦如之皆祭贊以肝從皆振祭臍肝皆實于菹豆卒爵皆拜贊答拜受爵再醕如初無從三醕用盃亦如之贊洗爵酌于戶外尊入戶西北面奠爵拜皆答拜坐祭卒爵拜皆答拜興主人出婦復位乃徹于房

中如設于室尊否主人說服于房媵受婦說服于室御受姆授巾御衽于奧媵衽良席在東皆有枕北止主人入親說婦之纓燭出媵餽主人之餘御餽婦餘贊酌外尊醕之媵侍于戶外呼則聞夙興婦沐浴纒笄宵衣以俟見質明贊見婦於舅姑席于阼舅卽席席于房外南面姑卽席婦執笄棗栗自門入升自西階進拜奠于席舅坐撫之興答拜婦還又拜降階受笄服修升進北面拜奠于席姑坐舉以興拜授人贊醴婦

席于戶牖間側尊甒醴于房中婦疑立于席西贊者酌醴加枳而枋出房席前北面婦東面拜受贊西階上北面拜送婦又拜薦脯醢婦升席左執觶右祭脯醢以枳祭醴三降席東面坐啐醴建枳與拜贊荅拜婦又拜奠于薦東北面坐取脯降出授人于門外舅姑入于室婦盥饋特豚合升側載無魚腊無稷並南上其他如取女禮婦贊成祭卒食一醕無從席于北墉下婦徹設席前如初西上婦餽舅辭易醬婦餽姑之饌

御贊祭豆黍肺舉肺脊乃食卒姑醕之婦拜受姑拜送坐祭卒爵姑受奠之婦徹于房中媵御餽姑醕之雖無媵媵先於是與始飯之錯舅姑共饗婦以一獻之禮舅洗于南洗姑洗于北洗奠酬舅姑先降自西階婦降自阼階歸婦俎于婦氏人舅饗送者以一獻之禮酬以束錦姑饗婦人送者酬以束錦若異邦則贈丈夫送者以束錦若舅姑既沒則婦入三月乃奠菜席于廟與東面右几席于北方南面祝盥婦盥于門外

婦執筭菜祝帥婦以入祝告稱婦之姓曰某氏
來婦敢奠嘉菜于皇舅某子婦拜扱地坐奠菜
于几東席上還又拜如初婦降堂取筭菜入祝
曰某氏來婦敢告于皇始某氏奠菜于席如初
禮婦出祝闔牖戶老醴婦于房中南面如舅姑
醴婦之禮壻饗婦送者丈夫婦人如舅姑饗禮
記士昏禮凡行事必用昏昕受諸禴廟辭無不
腆無辱摯不用死皮帛必可制腊必用鮮魚用
鮒必殺全女子許嫁筭而醴之稱字祖廟未毀

而醴之稱字祖廟未毀已毀則教于宗室問名
主人受鴈還西面對賓受命乃降祭醴始扱一
祭又扱再祭賓右取脯左奉之乃歸執以反命
納徵執皮攝之內文兼執足左首隨入西上參
分庭一在南賓致命釋外足見文主人受幣士
受皮者自東出于後自左受遂坐攝皮逆退適
東壁父醴女而俟迎者母南面于房外女出于
母左父西面戒之必有正焉若衣若筭母戒諸
西階上不降婦乘以几從者二人坐持几相對

婦入寢門贊者徹尊冪酌玄酒三屬于尊棄餘水于堂下階閒加勺筭緇被纁裏加于橋舅荅拜宰徹筭婦席薦饌于房饗婦姑薦焉婦洗在北堂直室東隅篚在東北面盥婦酢舅更爵自薦不敢辭洗舅降則辟于房不敢拜洗凡婦人相饗無降婦入三月然後祭行庶婦則使人醮之婦不饋昏辭曰吾子有惠貺室某也某有先人之禮使某也請納采對曰某之子蠢愚又弗能教吾子命之某不敢辭致命曰敢納采問名

曰某既受命將加諸卜敢請女爲誰氏對曰吾子有命且以備數而擇之某不敢辭醴曰子爲事故至于某之室某有先人之禮請醴從者對曰某既得將事矣敢辭先人之禮敢固以請某辭不得命敢不從也納吉曰吾子有貺命某加諸卜占曰吉使某也敢告對曰某之子不教唯恐弗堪子有吉我與在某不敢辭納徵曰吾子有嘉命貺室某也某有先人之禮儷皮束帛使某也請納徵致命曰其敢納徵對曰吾子順先

典貺其重禮某不敢辭敢不承命請期曰吾子有賜命其既申受命矣惟是三族之不虞使其也請吉日對曰某既前受命矣唯命是聽曰某命其聽命于吾子對曰某固惟命是聽使者曰某使其受命吾子不許某敢不告期曰某日對曰某敢不敬須凡使者歸反命曰某既得將事矣敢以禮告主人曰聞命矣父醮子命之辭曰往迎爾相承我宗事勗帥以敬先妣之嗣若則有常子曰諾唯恐弗堪不敢忘命賓至擯者請

對曰吾子命某以茲初昏使其將請承命對曰某固敬具以須父送女命之曰戒之敬之夙夜毋違命母施衿結帨曰勉之敬之夙夜無違宮事庶母及門內施鞶申之以父母之命命之曰敬恭聽宗爾父母之言夙夜無愆視諸衿鞶宗子無父母命之親皆沒已躬命之支子則稱其宗弟則稱其兄若不親迎則婦入三月然後壻見曰某以得爲外昏姻請覲主人對曰某以得爲外婚姻之數某之子未得濯漑於祭祀是以

未敢見今吾子辱請吾子之就宮某將走見對曰某以非它故不足以辱命請終賜見對曰某以得爲昏姻之故不敢固辭敢不從主人出門左西面壻入門東面奠摯再拜出擯者以摯出請受壻禮辭許受摯入主人再拜受壻再拜送出見主婦主婦闔扉立于其內壻立于門外東面主婦一拜壻答再拜主婦又拜壻出主人請醴及揖讓入醴以一獻之禮主婦薦奠酬無幣壻出主人送再拜

二卷終

儀禮卷三

士相見禮

贄冬用雉夏用牯左頭奉之曰某也願見無由達某子以命命某見主人對曰某子命某見吾子有辱請吾子之就家也某將走見賓對曰某不足以辱命請終賜見主人對曰某不敢爲儀固請吾子之就家也某將走見賓對曰某不敢爲儀固以請主人對曰某也固辭不得命將走見聞吾子稱贄敢辭贄賓對曰某不以贄不敢

見主人對曰某不足以習禮敢固辭賓對曰某也不依於贄不敢見固以請主人對曰某也固辭不得命敢不敬從出迎于門外再拜賓荅再拜主人揖入門右賓奉贄入門左主人再拜受賓再拜送贄出主人請見賓反見退主人送于門外再拜主人復見之以其贄曰鄉者吾子辱使其見請還贄於將命者主人對曰某也既得見矣敢辭賓對曰某也非敢求見請還贄於將命者主人對曰某也既得見矣敢固辭賓對曰

某不敢以聞固以請於將命者主人對曰某也固辭不得命敢不從賓奉贄入主人再拜受賓再拜送贄出主人送于門外再拜士見於大夫終辭其贄於其入也一拜其辱也賓退送再拜若常爲臣者則禮辭其贄曰某也辭不得命不敢固辭賓入奠贄再拜主人荅一拜賓出使擯者還其贄于門外曰某也使其還贄賓對曰某也既得見矣敢辭擯者對曰某也命某某非敢爲儀也敢以請賓對曰某也夫子之賤私不足

以踐禮敢固辭擯者對曰某也使某不敢爲儀也固以請賓對曰某固辭不得命敢不從再拜受下大夫相見以鴈飾之以布維之以索如執雉上大夫相見以羔飾之以布四維之結于面左頭如麇執之如士相見之禮始見于君執贄至下容彌蹙庶人見於君不爲容進退走士大夫則莫贄再拜稽首君答壹拜若他邦之人則使擯者還其贄曰寡君使其還贄賓對曰君不有其外臣臣不敢辭再拜稽首受凡燕見于君

必辯君之南面若不得則正方不疑君君在堂升見無方階辯君所在凡言非對也妥而後傳言與君言言使臣與大人言言事君與老者言言使弟子與幼者言言孝弟於父兄與衆言言忠信慈祥與居官者言言忠信凡與大人言始視面中視抱卒視面毋改衆皆若是若父則遊目毋上於面毋下於帶若不言立則視足坐則視膝凡侍坐於君子君子欠伸問日之早晏以食具告改居則請退可也夜侍坐問夜膳葷請

退可也若君賜之食則君祭先飯徧嘗膳飲而
俟君命之食然後食若有將食者則俟君之食
然後食若君賜之爵則下席再拜稽首受爵升
席祭卒爵而俟君卒爵然後授虛爵退坐取屨
隱辟而后屨君爲之興則曰君無爲興臣不敢
辭君若降送之則不敢顧辭遂出大夫則辭退
下比及門三辭若先生異爵者請見之則辭辭
不得命則曰某無以見辭不得命將走見先見
之非以君命使則不稱寡大夫士則曰寡君之
老凡執幣者不趨容彌蹙以爲儀執玉者則唯
舒武舉前曳踵凡自稱於君士大夫則曰下臣
宅者在邦則曰市井之臣在野則曰草茅之臣
庶人則曰刺草之臣他國之人則曰外臣

儀禮卷三

終

儀禮卷四

鄉飲酒之禮

主人就先生而謀賓介主人戒賓賓拜辱主人
答拜乃請賓賓禮辭許主人再拜賓答拜主人
退賓拜辱介亦如之乃席賓主人介衆賓之席
皆不屬焉尊兩壺于房戶間斯禁有玄酒在西
設篚于禁南東肆加二勺于兩壺設洗于阼階
東南南北以堂深東西當東榮水在洗東篚在
洗西南肆羹定主人速賓賓拜辱主人答拜還

賓拜辱介亦如之賓及衆賓皆從之主人一相
迎于門外再拜賓賓答拜拜介介答拜揖衆賓
主人揖先入賓厭介入門左介厭衆賓入衆賓
皆入門左北上主人與賓三揖至于階三讓主
人升賓升主人阼階上當楣北面再拜賓西階
上當楣北面答拜主人坐取爵于筐降洗賓降
主人坐奠爵于階前辭賓對主人坐取爵與適
洗南面坐奠爵于筐下盥洗賓進東北面辭洗
主人坐奠爵于筐與對賓復位當西序東面主

人坐取爵沃洗者西北面卒洗主人壹揖壹讓
升賓拜洗主人坐奠爵遂拜降盥賓降主人辭
賓對復位當西序卒盥揖讓升賓西階上疑立
主人坐取爵實之賓之席前西北面獻賓賓西
階上拜主人少退賓進受爵以復位主人阼階
上拜送爵賓少退薦脯醢賓升席自西方乃設
折俎主人阼階東疑立賓坐左執爵祭脯醢奠
爵于薦西與右手取肺卻左手執本坐弗繚右
絕末以祭尚左手齊之與加于俎坐扱手遂祭

酒與席末坐啐酒降席坐奠爵拜告旨執爵興
主人阼階上答拜賓西階上北面坐卒爵興坐
奠爵遂拜執爵興主人阼階上答拜賓降洗主
人降賓坐奠爵興辭主人對賓坐取爵適洗南
北面主人阼階東南面辭洗賓坐奠爵于篚興
對主人復阼階東西面賓東北面盥坐取爵卒
洗揖讓如初升主人拜洗賓答拜興降盥如主
人禮賓實爵主人之席前東南面酢主人主人
阼階上拜賓少退主人進受爵復位賓西階上

拜送爵薦脯醢主人升席自北方設折俎祭如
賓禮不告旨自席前適阼階上北面坐卒爵興
坐奠爵遂拜執爵興賓西階上答拜主人坐奠
爵于序端阼階上北面再拜崇酒賓西階上答
拜主人坐取觶于篚降洗賓降主人辭降賓不
辭洗立當西序東面卒洗揖讓升賓西階上疑
立主人實觶酬賓阼階上北面坐奠觶遂拜執
觶興賓西階上答拜坐祭遂飲卒觶興坐奠觶
遂拜執觶興賓西階上答拜主人降洗賓降辭

如獻禮升不拜洗賓西階上立主人實觶賓之
席前北面賓西階上拜主人少退卒拜進坐奠
觶于薦西賓辭坐取觶復位主人阼階上拜送
賓北面坐奠觶于薦東復位主人揖降賓降立
于階西當序東面主人以介揖讓升拜如賓禮
主人坐取爵于東序端降洗介降主人辭降介
辭洗如賓禮升不拜洗介西階上立主人實爵
介之席前西南面獻介介西階上北面拜主人
少退介進北面受爵復位主人介右北面拜送

爵介少退主人立于西階東薦脯醢介升席自
北方設折俎祭如賓禮不啐肺不啐酒不告旨
自南方降席北面坐卒爵興坐奠爵遂拜執爵
興主人介右答拜介降洗主人復阼階降辭如
初卒洗主人盥介揖讓升授主人爵于兩楹之
間介西階上立主人實爵酢于西階上介右坐
奠爵遂拜執爵興介答拜主人坐祭遂飲卒爵
興坐奠爵遂拜執爵興介答拜主人坐奠爵于
西楹南介右再拜崇酒介答拜主人復阼階揖

降介降立于賓南主人西南面三拜衆賓衆賓皆答壹拜主人揖升坐取爵于西楹下降洗升實爵于西階上獻衆賓衆賓之長升拜受者三人主人拜送坐祭立飲不拜既爵授主人爵降復位衆賓獻則不拜受爵坐祭立飲每一人獻則薦諸其席衆賓辯有脯醢主人以爵降奠于篚揖讓升賓厭介升介厭衆賓升衆賓序升卽席一人洗升舉觶于賓實觶西階上坐奠觶遂拜執觶與賓席末答拜坐祭遂飲卒觶興坐奠上賓拜進坐奠觶于薦西賓辭坐受以興舉觶者西階上拜送賓坐奠觶于其所舉觶者降設席于堂廉東上工四人二瑟瑟先相者二人皆左何瑟後首擗越內弦右手相樂正先升立于西階東工入升自西階北面坐相者東面坐遂授瑟乃降工歌鹿鳴四牡皇皇者華卒歌主人獻工工左瑟一人拜不興受爵主人阼階上拜送爵薦脯醢使人相祭工飲不拜既爵授主人

爵衆工則不拜受爵祭飲辨有脯醢不祭大師
則爲之洗賓介降主人辭降工不辭洗笙入堂
下磬南北面立樂南陔白華華黍主人獻之于
西階上一人拜盡階不升堂受爵主人拜送爵
階前坐祭立飲不拜既爵升授主人爵衆笙則
不拜受爵坐祭立飲辨有脯醢不祭乃間歌魚
麗笙由庚歌南有嘉魚笙崇丘歌南山有臺笙
由儀乃合樂周南關雎葛覃卷耳召南鵲巢采
繁采蘋工告于樂正曰正歌備樂正告于賓乃

降主人降席自南方側降作相爲司正司正禮
辭許諾主人拜司正答拜主人升復席司正洗
觶升自西階阼階上北面受命于主人主人曰
請安于賓司正告于賓賓禮辭許司正告于主
人主人阼階上再拜賓西階上答拜司正立于
楹間以相拜皆揖復席司正實觶降自西階階
間北面坐奠觶退共少立坐取觶不祭遂飲卒
觶興坐奠觶遂拜執觶興洗北面坐奠觶于其
所退立于觶南賓北面坐取俎西之觶阼階上

北面酬主人主人降席立于賓東賓坐奠觶遂拜執觶興主人答拜不祭立飲不拜卒觶不洗實觶東南面授主人主人阼階上拜賓少退主人受觶賓拜送于主人之西賓揖復席主人西階上酬介介降席自南方立于主人之西如賓酬主人之禮主人揖復席司正升相旅曰某子受酬受酬者降席司正退立于序端東面受酬者自介右衆受酬者受自左拜興飲皆如賓酬主人之禮辭卒受者以觶降坐奠于篚司正降

復位使二人舉觶于賓介洗升實觶于西階上皆坐奠觶遂拜執觶興賓介席末答拜皆坐祭遂飲卒觶興坐奠觶遂拜執觶興賓介席末答拜逆降洗升實觶皆立于西階上賓介皆拜皆進薦西奠之賓辭坐取觶以興介則薦南奠之介坐受以興退皆拜送降賓介奠于其所司正升自西階受命于主人主人曰請坐于賓賓辭以俎主人請徹俎賓許司正降階前命弟子俟徹俎司正升立于席端賓降席北面主人降席

阼階上北面介降席西階上北面尊者降席東
南面賓取俎還授司正司正以降賓從之主人
取俎還授弟子弟子以降自西階主人降自阼
階介取俎還授弟子弟子以降介從之若有諸
公大夫則使人受俎如賓禮衆賓皆降說屨揖
讓如初升坐乃羞無筭爵無筭樂賓出奏陔三
人送于門外再拜賓若有尊者諸公大夫則既
一人舉觶乃入席于賓東公三重大夫再重公
如大夫入主人降賓介降衆賓皆降復初位主

人迎揖讓升公升如賓禮辭一席使一人去之
大夫則如介禮有諸公則辭加席委于席端主
人不徹無諸公則大夫辭加席主人對不去加
席明日賓服鄉服以拜賜主人如賓服以拜辱
主人釋服乃息司正無介不殺薦脯醢羞唯所
有徵唯所欲以告于先生君子可也賓介不與
鄉樂唯欲記鄉朝服而謀賓介皆使能不宿戒
蒲筵緇布純尊綌幕賓至徹之其牲狗也享于
堂東北獻用爵其他用觶薦脯五挺橫祭于其

上出自左房俎由東壁自西階升賓俎脊脅肩
肺主人俎脊脅臂肺介俎脊脅胛肺肺皆離皆
右體進腩以爵拜者不徒作坐卒爵者拜既爵
立卒爵者不拜既爵凡奠者於左將舉於右衆
賓之長一人辭洗如賓禮立者東面北上若有
北面者則東上樂正與立者皆薦以齒凡舉爵
三作而不徒爵樂作大夫不入獻工與笙取爵
于上篚既獻奠于下篚其笙則獻諸西階上磬
階間縮雷北面鼓之主人介凡升席自北方降
自南方司正既舉觶而薦諸其位凡旅不洗不
洗者不祭既旅士不入徹俎賓介尊者之俎受
者以降遂出授從者主人之俎以東樂正命奏
陔賓出至于階陔作若有諸公則大夫於主人
之北西面主人之贊者西面北上不與無筭爵
然後與

儀禮卷四

終

儀禮卷五

鄉射禮

主人戒賓賓出迎再拜主人答再拜乃請賓禮
辭許主人再拜賓答再拜主人退賓送再拜無
介乃席賓南面東上衆賓之席繼而西席主人
於阼階上西面尊於賓席之東兩壺斯禁左玄
酒皆加勺篚在其南東肆設洗于阼階東南南
北以堂深東西當東榮水在洗東篚在洗西南
肆縣于洗東北西面乃張侯下綱不及地武不

繫左下綱中掩束之乏參侯道居侯黨之一西
五步羹定主人朝服乃速賓賓朝服出迎再拜
主人答再拜退賓送再拜賓及衆賓遂從之及
門主人一相出迎于門外再拜賓答再拜揖衆
賓主人以賓揖先入賓厭衆賓衆賓皆入門左
東面北上賓少進主人以賓三揖皆行及階三
讓主人升一等賓升主人阼階上當楣北面再
拜賓西階上當楣北面答再拜主人坐取爵于
上篚以降賓降主人阼階前西面坐奠爵興辭

降賓對主人坐取爵興適洗南面坐奠爵于篚下
盥洗賓進東北面辭洗主人坐奠爵于篚興對
賓反位主人卒洗壹揖壹讓以賓升賓西階上
北面拜洗主人阼階上北面奠爵遂答拜乃降
賓降主人辭降賓對主人卒盥壹揖壹讓升賓
升西階上疑立主人坐取爵實之賓席之前西
北面獻賓賓西階上北面拜主人少退賓進受
爵于席前復位主人阼階上拜送爵賓少退薦
脯醢賓升席自西方乃設折俎主人阼階東疑

立賓坐左執爵右祭脯醢奠爵于薦西與取肺
坐絕祭尚左手齊之興加于俎坐挽手執爵遂
祭酒興席末坐啐酒降席坐奠爵拜告旨執爵
興主人阼階上答拜賓西階上北面坐卒爵興
坐奠爵遂拜執爵興主人阼階上答拜賓以虛
爵降主人降賓西階前東面坐奠爵興辭降主
人對賓坐取爵適洗北面坐奠爵于篚下興盥
洗主人阼階之東南面辭洗賓坐奠爵于篚興
對主人反位賓卒洗揖讓如初升主人拜洗賓

答拜興降盥如主人之禮賓升實爵主人之席
前東南面酢主人主人阼階上拜賓少退主人
進受爵復位賓西階上拜送爵薦脯醢主人升
席自北方乃設折俎祭如賓禮不告旨自席前
適阼階上北面坐卒爵興坐奠爵遂拜執爵興
賓西階上北面答拜主人坐奠爵于序端阼階
上再拜崇酒賓西階上答再拜主人坐取觶于
篚以降賓降主人奠觶辭降賓對東面立主人
坐取觶洗賓不辭洗卒洗揖讓升賓西階上疑

立主人實觶酬之阼階上北面坐奠觶遂拜執
觶與賓西階上北面答拜主人坐祭遂飲卒觶
興坐奠觶遂拜執觶與賓西階上北面答拜主
人降洗賓降辭如獻禮升不拜洗賓西階上立
主人實觶賓之席前北面賓西階上拜主人坐
奠觶于薦西賓辭坐取觶以興反位主人阼階
上拜送賓北面坐奠觶于薦東反位主人揖降
賓降東面立于西階西當西序主人西南面三
拜衆賓衆賓皆答一拜主人揖升坐取爵于序

端降洗升實爵西階上獻衆賓衆賓之長升拜
受者三人主人拜送坐祭立飲不拜旣爵授主
人爵降復位衆賓皆不拜受爵坐祭立飲每一
人獻則薦諸其席衆賓辯有脯醢主人以虛爵
降奠于篚揖讓升賓厭衆賓升衆賓皆升就席
一人洗舉觶於賓升實觶西階上坐奠觶拜執
觶興賓席末答拜舉觶者坐祭遂飲卒觶興坐
奠觶拜執觶興賓答拜降洗升實之西階上北
面賓拜舉觶者進坐奠觶于薦西賓辭坐取以

興舉觶者西階上拜送賓反奠于其所舉觶者降大夫若有遵者則入門左主人降賓及衆賓皆降復初位主人揖讓以大夫升拜至大夫荅拜主人以爵降大夫降主人辭降大夫辭洗如賓禮席於尊東升不拜洗主人實爵席前獻于大夫大夫西階上拜進受爵反位主人大夫之右拜送大夫辭加席主人對不去加席乃薦脯醢大夫升席設折俎祭如賓禮不啻肺不啻酒不告旨西階上卒爵拜主人荅拜大夫降洗主人

人復阼階降辭如初卒洗主人盥揖讓升大夫授主人爵于兩楹間復位主人實爵以酢于西階上坐奠爵拜大夫荅拜坐祭卒爵拜大夫荅拜主人坐奠爵于西楹南再拜崇酒大夫荅拜主人復阼階揖降大夫降立于賓南主人揖讓以賓升大夫及衆賓皆升就席席工於西階上少東樂正先升北面立于其西工四人二瑟瑟先相者皆左何瑟面鼓執越內弦右手相入升自西階北面東上工坐相者坐授瑟乃降笙入

立于縣中西面乃合樂周南關雎葛覃卷耳召南鵲巢采芣采蘋工不興告于樂正曰正歌備樂正告于賓乃降主人取爵于上篚獻工大師則爲之洗賓降主人辭降工不辭洗卒洗升實爵工不興左瑟一人拜受爵主人阼階上拜送爵薦脯醢使人相祭工飲不拜既爵授主人爵衆工不拜受爵祭飲辯有脯醢不祭不洗遂獻笙于西階上笙一人拜于下盡階不升堂受爵主人拜送爵階前坐祭立飲不拜既爵升授主

人爵衆笙不拜受爵坐祭立飲辯有脯醢不祭主人以爵降奠于篚反升就席主人降席自南方側降作相爲司正司正禮辭許諾主人再拜司正荅拜主人升就席司正洗觶升自西階由楹內適阼階上北面受命于主人西階上北面請安于賓賓禮辭許司正告于主人遂立于楹間以相拜主人阼階上再拜賓西階上荅再拜皆揖就席司正實觶降自西階中庭北面坐奠觶興退少立進坐取觶興反坐不祭遂卒觶興坐奠

解拜執解興洗北面坐奠于其所興少退北面
立于解南未旅三耦俟于堂西南面東上司射適
堂西袒決遂取弓于階西兼挾乘矢升自西階
階上北面告于賓曰弓矢既具有司請射賓對
曰某不能爲二三子許諾司射適阼階上東北
面告于主人曰請射于賓賓許司射降自西階
階前西面命弟子納射器乃納射器皆在堂西
賓與大夫之弓倚于西序矢在弓下北括衆弓
倚于堂西矢在其上主人之弓矢在東序東司

射不釋弓矢遂以比三耦於堂西三耦之南北
面命上射曰某御於子命下射曰子與某子射
司正爲司馬司馬命張侯弟子說東遂繫左下
綱司馬又命獲者倚旌于侯中獲者由西方坐
取旌倚于侯中乃退樂正適西方命弟子贊工
遷樂于下弟子相工如初入降自西階阼階下
之東南堂前三筈西面北上坐樂正北面立于
其南司射猶挾乘矢以命三耦各與其耦讓取
弓矢拾三耦皆袒決遂有司左執弣右執弦而

授弓遂授矢三耦皆執弓搯三而挾一个司設先立于所設中之西南東面三耦皆進由司射之西立于其西南東面北上而俟司射東面立于三耦之北搯三而挾一个揖進當階北面揖及階揖升堂揖豫則鉤楹內堂則由楹外當左物北面揖及物揖左足履物不方足還視侯中俯正足不去旌誘射將乘矢執弓不挾右執弦南面揖揖如升射降出于其位南適堂西改作一个挾之遂適階西取扑搯之以反位司馬命

獲者執旌以負侯獲者適侯執旌負侯而俟司射還當上耦西面作上耦射司射反位上耦揖進上射在左並行當階北面揖及階揖上射先升三等下射從之中等上射升堂少左下射升上射揖並行皆當其物北面揖及物揖皆左足履物還視侯中合足而俟司馬適堂西不決遂袒執弓出于司射之南升自西階鉤楹由上射之後西南面立于物間右執簫南揚弓命去侯獲者執旌許諾聲不絕以至于乏坐東面偃旌

興而俟司馬出于下射之南還其後降自西階
反由司射之南適堂西釋弓襲反位立于司射
之南司射進與司馬交于階前相左由堂下西
階之東北面視上射命曰無射獲無獵獲上射
揖司射退反位乃射上射既發挾弓矢而后下
射射拾發以將乘矢獲者坐而獲舉旌以宮偃
旌以商獲而未釋獲卒射皆執弓不挾南面揖
揖如升射上射降三等下射少右從之中等並
行上射於左與升射者相左交于階前相揖由

司馬之南適堂西釋弓說決拾襲而俟于堂西
南面東上三耦卒射亦如之司射去扑倚于西
階之西升堂北面告于賓曰三耦卒射賓揖司
射降搢扑反位司馬適堂西袒執弓由其位南
進與司射交于階前相左升自西階鉤楹自右
物之後立于物間西南面揖弓命取矢獲者執
旌許諾聲不絕以旌負侯而俟司馬出于左物
之南還其後降自西階遂適堂前北面立于所
設楅之南命弟子設楅乃設楅于中庭南當洗

東肆司馬由司射之南退釋弓于堂西襲反位
弟子取矢北面坐委于楅北括乃退司馬襲進
當楅南北面坐左右撫矢而乘之若矢不備則
司馬又袒執弓如初升命曰取矢不索弟子自
西方應曰諾乃復求矢加于楅司射倚扑于階
西升請射于賓如初賓許諾賓主人大夫若皆與
射則遂告于賓適阼階上告于主人主人與
賓爲耦遂告于大夫大夫雖衆皆與士爲耦以
耦告于大夫曰某御于子西階上北面作衆賓

射司射降搢扑由司馬之南適堂西立比衆耦
衆賓將與射者皆降由司馬之南適堂西繼三
耦而立東上大夫之耦爲上若有東面者則北
上賓主人與大夫皆未降司射乃比衆耦辯遂
命三耦拾取矢司射反位三耦拾取矢皆袒決
遂執弓進立于司馬之西南司射作上耦取矢
司射反位上耦揖進當楅北面揖及楅揖上射
東面下射西面上射揖進坐橫弓卻手自弓下
取一个兼諸射順羽且興執弦而左還退反位

東面揖下射進坐橫弓覆手自弓上取一個與
其他如上射既拾取乘矢揖皆左還南面揖皆
少進當楅南皆左還北面楅三挾一個揖皆左
還上射於右與進者相左相揖反位三耦拾取
矢亦如之後者遂取誘射之矢兼乘矢而取之
以授有司于西方而后反位衆賓未拾取矢皆
袒決遂執弓楅三挾一個由堂西進繼三耦之
南而立東面北上大夫之耦爲上司射作射如
初一耦揖升如初司馬命去侯獲者許諾司馬

降釋弓反位司射猶挾一個去扑與司馬交于
階前升請釋獲于賓賓許降楅扑西面立于所
設中之東北面命釋獲者設中遂視之釋獲者
執鹿中一人執筭以從之釋獲者坐設中南當
楅西當西序東面興受筭坐實八筭于中橫委
其餘于中西南末興共而俟司射遂進由堂下
北面命曰不貫不釋上射揖司射退反位釋獲
者坐取中之八筭改實八筭于中興執而俟乃
射若中則釋獲者坐而釋獲每一個釋一筭上

射於右下射於左若有餘筭則反委之又取中之八筭改實八筭于中興執而俟三耦卒射賓主人大夫揖皆由其階降揖主人堂東袒決遂執弓搯三挾一个賓於堂西亦如之皆由其階階下揖升堂揖主人爲下射皆當其物北面揖及物揖乃射卒南面揖皆由其階階上揖降階揖賓序西主人序東皆釋弓說決拾襲反位升及階揖升堂揖皆說席大夫袒決遂執弓搯三挾一个由堂西出于司射之西就其耦大夫爲

下射揖進耦少退揖如三耦及階耦先升卒射揖如升射耦先降降階耦少退皆釋弓于堂西襲耦遂止于堂西大夫升就席衆賓繼射釋獲皆如初司射所作唯上耦卒射釋獲者遂以所執餘獲升自西階盡階不升堂告于賓曰左右卒射降反位坐委餘獲于中西興共而俟司馬袒決執弓升命取矢如初獲者許諾以旌負侯如初司馬降釋弓反位弟子委矢如初大夫之矢則兼束之以茅上握焉司馬乘矢如初司射

遂適西階西釋弓去扑襲進由中東立于中南北
面視筭釋獲者東面于中西坐先數右獲二筭爲
純一純以取實于左手十純則縮而委之每委異
之有餘純則橫于下一筭爲竒竒則又縮諸純下
興自前適左東面坐兼斂筭實于左手一純以委
十則異之其餘如右獲司射復位釋獲者遂進
取賢獲執以升自西階盡階不升堂告于賓若
右勝則曰右賢於左若左勝則曰左賢于右以
純數告若有竒者亦曰竒若左右鈞則左右皆

執一筭以告曰左右鈞降復位坐兼斂筭實八
筭于中委其餘于中西興共而俟司射適堂西
命弟子設豐弟子奉豐升設于西楹之西乃降
勝者之弟子洗觶升酌南面坐奠于豐上降袒
執弓反位司射遂袒執弓挾一个摺扑北面于
三耦之南命三耦及衆賓勝者皆袒決遂執張
弓不勝者皆襲說決拾卻左手右加弛弓于其
上遂以執弣司射先反位三耦及衆射者皆與
其耦進立于射位北上司射作升飲者如作射

一耦進揖如升射及階勝者先升堂少右不勝者進北面坐取豐上之觶興少退立卒觶進坐奠于豐下興揖不勝者先降與升飲者相左交于階前相揖出于司馬之南遂適堂西釋弓襲而俟有執爵者執爵者坐取觶實之反奠于豐上升飲者如初三耦卒飲賓主人大夫不勝則不執弓執爵者取觶降洗升實之以授于席前受觶以適西階上北面立飲卒觶授執爵者反就席大夫飲則耦不升若大夫之耦不勝則亦

執弛弓特升飲衆賓繼飲射爵者辯乃徹豐與觶司馬洗爵升實之以降獻獲者于侯薦脯醢設折俎俎與薦皆三祭獲者負侯北面拜受爵司馬西面拜送爵獲者執爵使人執其薦與俎從之適右个設薦俎獲者南面坐左執爵祭脯醢執爵興取肺坐祭遂祭酒興適左个中亦如之左个之西北三步東面設薦俎獲者薦右東面立飲不拜既爵司馬受爵奠于篚復位獲者執其薦使人執俎從之辟設于之南獲者負侯

而俟司射適階西釋弓矢去扑說決拾襲適洗
洗爵升實之以降獻釋獲者于其位少南薦脯
醢折俎有祭釋獲者薦右東面拜受爵司射北
面拜送爵釋獲者就其薦坐左執爵祭脯醢興
取肺坐祭遂祭酒興司射之西北面立飲不拜
既爵司射受爵奠于篚釋獲者少西辟薦反位
司射適堂西袒決遂取弓于階西挾一个搯扑
以反位司射去扑倚于階西升請射于賓如初
賓許司射降搯扑由司馬之南適堂西命三耦

及衆賓皆袒決遂執弓就位司射先反位三耦
及衆賓皆袒決遂執弓各以其耦進反于射位
司射作拾取矢三耦拾取矢如初反位賓主人
大夫降揖如初主人堂東賓堂西皆袒決遂執
弓皆進階前揖及楅揖拾取矢如三耦卒北面
搯三挾一个揖退賓堂西主人堂東皆釋弓矢
襲及階揖升堂揖就席大夫袒決遂執弓就其
耦揖皆進如三耦耦東面大夫西面大夫進坐
說矢束興反位而后耦揖進坐兼取乘矢順羽

而興反位揖大夫進坐亦兼取乘矢如其耦北面搯三挾一个揖退耦反位大夫遂適序西釋弓矢襲升卽席衆賓繼拾取矢皆如三耦以反位司射猶挾一个以進作上射如初一耦揖升如初司馬升命去侯獲者許諾司馬降釋弓反位司射與司馬交于階前去扑襲升請以樂樂于賓賓許諾司射降搯扑東面命樂正曰請以樂樂于賓賓許司射遂適階間堂下北面命曰不鼓不釋上射揖司射退反位樂正東面命

師曰奏騶虞間若一大師不興許諾樂正退反位乃奏騶虞以射三耦卒射賓主人大夫衆賓繼射釋獲如初卒射降釋獲者執餘獲升告左右卒射如初司馬升命取矢獲者許諾司馬降釋弓反位弟子委矢司馬乘之皆如初司射釋弓視筭如初釋獲者以賢獲與鈞告如初降復位司射命設豐設豐實觶如初遂命勝者執張弓不勝者執弛弓升飲如初司射猶袒決遂左執弓右執一个兼諸弦面鏃適堂西以命拾取

傳禮 卷五 十一
矢如初司射反位三耦及賓主人大夫衆賓皆袒決遂拾取矢如初矢不挾兼諸弦弣以退不反位遂授有司于堂西辯拾取矢揖皆升就席司射乃適堂西釋弓去扑說決拾襲反位司馬命弟子說侯之左下綱而釋之命獲者以旌退命弟子退福司射命釋獲者退中與筭而侯司馬反爲司正退復解南而立樂正命弟子贊工卽位弟子相工如其降也升自西階反坐賓北面坐取俎西之解與阼階上北面酬主人主人

降席立于賓東賓坐奠解拜執解與主人答拜賓不祭卒解不拜不洗實之進東南面主人阼階上北面拜賓少退主人進受解賓主人之西北面拜送賓揖就席主人以解適西階上酬大夫大夫降席立于主人之西如賓酬主人之禮主人揖就席若無大夫則長受酬亦如之司正升自西階相旅作受酬者曰某酬某子受酬者降席司正退立于西序端東面衆受酬者拜與飲皆如賓酬主人之禮辯遂酬在下者皆升受

酬于西階上卒受者以觶降奠于篚司正降復位使二人舉觶于賓與大夫舉觶者皆洗觶升實之西階上北面皆坐奠觶拜執觶與賓與大夫皆席末荅拜舉觶者皆坐祭遂飲卒觶興坐奠觶拜執觶與賓與大夫皆荅拜舉觶者逆降洗升實觶皆立于西階上北面東上賓與大夫拜舉觶者皆進坐奠于薦右賓與大夫辭坐受觶以興舉觶者退反位皆拜送乃降賓與大夫反奠于其所興若無大夫則唯賓司正升自西

階阼階上受命于主人適西階上北面請坐于賓賓辭以俎反命于主人主人曰請徹俎賓許司正降自西階階前命弟子俟徹俎司正升立于序端賓降席北面主人降席自南方阼階上北面大夫降席席東南面賓取俎還授司正司正以降自西階賓從之降遂立于階西東面司正以俎出授從者主人取俎還授弟子弟子受俎降自西階以東主人降自阼階西面立大夫取俎還授弟子弟子以降自西階遂出授從者

大夫從之降立于賓南衆賓皆降立于大夫之南少退北上主人以賓揖讓說屨乃升大夫及衆賓皆說屨升坐乃羞無筭爵使二人舉觶賓與大夫不興取奠觶飲卒觶不拜執觶者受觶遂實之賓觶以之主人大夫之觶長受而錯皆不拜辯卒受者興以旅在下者于西階上長受酬酬者不拜乃飲卒觶以實之受酬者不拜受辯旅皆不拜執觶者皆與旅卒受者以虛觶降奠于筐執觶者洗升實觶反奠于賓與大夫無

筭樂賓興樂正命奏陔賓降及階陔作賓出衆賓皆出主人送于門外再拜明日賓朝服以拜賜于門外主人不見如賓服遂從之拜辱于門外乃退主人釋服乃息司正無介不殺使人速迎于門外不拜入升不拜至不拜洗薦脯醢無俎賓酢主人主人不崇酒不拜衆賓既獻衆賓一人舉觶遂無筭爵無司正賓不與徵唯所欲以告於鄉先生君子可也羞唯所有鄉樂唯欲記大夫與則公士爲賓使能不宿戒其牲狗也

亨于堂東北尊綌寡賓至徹之蒲筵緇布純西序之席北上獻用爵其他用觶以爵拜者不徒作薦脯用籩五臠祭半臠橫于上醢以豆出自東房臠長尺二寸俎由東壁自西階升賓俎脊脅肩肺主人俎脊脅臂肺肺皆離皆右體也進腍凡舉爵三作而不徒爵凡奠者於左將舉者於右衆賓之長一人辭洗如賓禮若有諸公則如賓禮大夫如介禮無諸公則大夫如賓禮樂作大夫不入樂正與立者齒三笙一和而成聲

獻工與笙取爵于上篚既獻奠于下篚其笙則獻諸西階上立者東面北上司正既舉觶而薦諸其位三耦者使弟子司射前戒之司射之弓矢與扑倚于西階之西司射既袒決遂而升司馬階前命張侯遂命倚旌凡侯天子熊侯白質諸侯麋侯赤質大夫布侯畫以虎豹士布侯畫以鹿豕凡畫者丹質射自楹間物長如筈其間容弓距隨長武序則物當棟堂則物當楣命負侯者由其位凡適堂西皆出入于司馬之南唯

賓與大夫降階遂西取弓矢旌各以其物無物則以白羽與朱羽糝杠長三仞以鴻脰韜上二尋凡挾矢於二指之間橫之司射在司馬之北司馬無事不執弓始射獲而未釋獲復釋獲復用樂行之上射於右楅長如筈博三寸厚寸有半龍首其中蛇交韋當楅髮橫而奉之南面坐而奠之南北當洗射者有過則撻之衆賓不與射者不降取誘射之矢者既拾取矢而后兼誘射之乘矢而取之賓主人射則司射擯升降卒

射卽席而反位卒事鹿中髮前足跪鑿背容八筭釋獲者奉之先首大夫降立于堂西以俟射大夫與士射袒纁襦耦少退于物司射釋弓矢視筭與獻釋獲者釋弓矢禮射不主皮主皮之射者勝者又射不勝者降主人亦飲于西階上獲者之俎折脊脅肺臠東方謂之右个釋獲者之俎折脊脅肺皆有祭大夫說矢束坐說之歌虞若采蘋皆五終射無筭古者於旅也語凡旅不洗不洗者不祭既旅士不人大夫後出主

人送于門外再拜鄉侯上個五尋中十尺侯道
五十弓弓二寸以爲侯中倍中以爲躬倍躬以
爲左右舌下舌半上舌箭籌八十長尺有握握
素楚朴長如筈刊本尺君射則爲下射上射退
于物一筈旣發則答君而俟君樂作而后就物
君袒朱襦以射小臣以巾執矢以授若飲君如
燕則夾爵君國中射則皮樹中以翽旌獲白羽
與未羽糝於郊則閭中以旌獲於竟則虎中龍
壇大夫兕中各以其物獲唯君有射于國中其

餘否君在大夫射則肉袒

儀禮卷五終

儀禮卷六

燕禮

小臣戒與者膳宰具官饌于寢東樂人縣設洗
篚于阼階東南當東霤壘水在東篚在洗西南
肆設膳篚在其北西面司官尊于東楹之西兩
方壺左玄酒南上公尊瓦大兩有豐冪用綌若
錫在尊南南上尊士旅食于門西兩圓壺司官
筵賓于戶西東上無加席也射人告具小臣設
公席于阼階上西鄉設加席公升卽位于席西

鄉小臣納卿大夫卿大夫皆入門右北面東上
士立于西方東面北上祝史立于門東北面東
上小臣師一人在東堂下南面士旅食者立于
門西東上公降立于阼階之東南南鄉爾卿卿
西面北上爾大夫大夫皆少進射人請賓公曰
命其爲賓射人命賓賓少進禮辭反命又命之
賓再拜稽首許諾射人反命賓出立于門外東
面公揖卿大夫乃升就席小臣自阼階下北面
請執冪者與羞膳者乃命執冪者執冪者升自

西階立于尊南北面東上膳宰請羞于諸公卿
者射人納賓賓入及庭公降一等揖之公升就
席賓升自西階主人亦升自西階賓右北面至
再拜賓答再拜主人降洗洗南西北面賓降階
西東面主人辭降賓對主人北面盥坐取觚洗
賓少進辭洗主人坐奠觚于篚與對賓反位主
人卒洗賓揖乃升主人升賓拜洗主人賓右奠
觚答拜降盥賓降主人辭賓對卒盥賓揖升主
人升坐取觚執冪者舉冪主人酌膳執冪者反

幕主人筵前獻賓賓西階上拜筵前受爵反位
主人賓右拜送爵膳宰薦脯醢賓升筵膳宰設
折俎賓坐左執爵右祭脯醢奠爵于薦右興取
肺坐絕祭嚌之興加于俎坐挽手執爵遂祭酒
興席末坐啐酒降席坐奠爵拜告旨執爵興主
人答拜賓西階上北面坐卒爵興坐奠爵遂拜
主人答拜賓以虛爵降主人降賓洗南坐奠觚
少進辭降主人東面對賓坐取觚奠于篚下盥
洗主人辭洗賓坐奠觚于篚興對卒洗及階揖

升主人升拜洗如賓禮賓降盥主人降賓辭降
卒盥揖升酌膳執幕如初以酢主人于西階上
主人北面拜受爵賓主人之左拜送爵主人坐
祭不啐酒不拜酒不告旨遂卒爵興坐奠爵拜
執爵興賓答拜主人不崇酒以虛爵降奠于篚
賓降立于西階西射人升賓賓升立于序內東
面主人盥洗象觚升實之東北面獻于公公拜
受爵主人降自西階阼階下北面拜送爵士薦
脯醢膳宰設折俎升自西階公祭如賓禮膳宰

贊授肺不拜酒立卒爵坐奠爵拜執爵興主人
答拜升受爵以降奠于膳篚更爵洗升酌膳酒
以降酢于阼階下北面坐奠爵再拜稽首公答
再拜主人坐祭遂卒爵再拜稽首公答再拜主
人奠爵于篚主人盥洗升媵觚于賓酌散西階
上坐奠爵拜賓賓降筵北面答拜主人坐祭遂
飲賓辭卒爵拜賓答拜主人降洗賓降主人辭
降賓辭洗卒洗揖升不拜洗主人酌膳賓西階
上拜受爵于筵前反位主人拜送爵賓升席坐

祭酒遂奠于薦東主人降復位賓降筵西東南
面立小臣自阼階下請媵爵者公命長小臣作
下大夫二人媵爵媵爵者阼階下皆北面再拜
稽首公答再拜媵爵者立于洗南西面北上序
進盥洗角觶升自西階序進酌散交于楹北降
阼階下皆奠觶再拜稽首執觶興公答再拜媵
爵者皆坐祭遂卒觶興坐奠觶再拜稽首執觶
興公答再拜媵爵者執觶待于洗南小臣請致
者若君命皆致則序進奠觶于篚阼階下皆再

拜稽首公答再拜媵爵者洗象觶升實之序進坐奠于薦南北上降阼階下皆再拜稽首送觶公答再拜公坐取大夫所媵觶興以酬賓賓降西階下再拜稽首公命小臣辭賓升成拜公坐奠觶答再拜執觶興立卒觶賓下拜小臣辭賓升再拜稽首公坐奠觶答再拜執觶興賓進受虛爵降奠于篚易觶洗公有命則不易不洗反升酌膳觶下拜小臣辭賓升再拜稽首公答再拜賓以旅酬於西階上射人作大夫長升受旅

賓大夫之右坐奠觶拜執觶興大夫答拜賓坐祭立飲卒觶不拜若膳觶也則降更觶洗升實散大夫拜受賓拜送大夫辯受酬如受賓酬之禮不祭卒受者以虛觶降奠于篚主人洗升實散獻卿于西階上司宮兼卷重席設于賓左東上卿升拜受觶主人拜送觶卿辭重席司宮徹之乃薦脯醢卿升席坐左執爵右祭脯醢遂祭酒不啐酒降席西階上北面坐卒爵興坐奠爵拜執爵興主人答拜受爵卿降復位辯獻卿主

人以虛爵降奠于篚射人乃升卿卿皆升就席
若有諸公則先卿獻之如獻卿之禮席于阼階
西北面東上無加席小臣又請媵爵者二大夫
媵爵如初請致者若命長致則媵爵者奠觶于
篚一人待于洗南長致致者阼階下再拜稽首
公答再拜洗象觶升實之坐奠于薦南降與立
于洗南者二人皆再拜稽首送觶公答再拜公
又行一爵若賓若長唯公所酬以旅于西階上
如初大夫卒受者以虛觶降奠于篚主人洗升

獻大夫于西階上大夫升拜受觶主人拜送觶
大夫坐祭立卒爵不拜既爵主人受爵大夫降
復位胥薦主人于洗北西面脯醢無胥辯獻大
夫遂薦之繼賓以西東上卒射人乃升大夫大
夫皆就席席工于西階上少東樂正先升北面
立于其西小臣納工工四人二瑟小臣左何瑟
面鼓執越內弦右手相入升自西階北面東上
坐小臣坐授瑟乃降工歌鹿鳴四牡皇皇者華
卒歌主人洗升獻工工不興左瑟一人拜受爵

主人西階上拜送爵薦脯醢使人相祭卒爵不拜主人受爵衆工不拜受爵坐祭遂卒爵辯有脯醢不祭主人受爵降奠于篚公又舉奠觶唯公所賜以旅于西階上如初卒笙入立于縣中奏南陔白華華黍主人洗升獻笙于西階上一人拜盡階不升堂受爵降主人拜送爵階前坐祭立卒爵不拜既爵升授主人衆笙不拜受爵降坐祭立卒爵辯有脯醢不祭乃間歌魚麗笙由庚歌南有嘉魚笙崇丘歌南山有臺笙由儀

遂歌鄉樂周南關雎葛覃卷耳召南鵲巢采芣采蘋大師告樂正曰正歌備樂正由楹內東楹之東告于公乃降復位射人自阼階下請立司正公許射人遂爲司正司正洗角觶南面坐奠于中庭升東楹之東受命西階上北面命卿大夫君曰以我安鄉大夫皆對曰諾敢不安司正降自西階南面坐取觶升酌散降南面坐奠觶右還北面少立坐取觶興坐不祭卒觶奠之興再拜稽首左還南面坐取觶洗南面反奠于其

所升自西階東楹之東請徹俎降公許告于賓
賓北面取俎以出膳宰徹公俎降自阼階以東
卿大夫皆降東面北上賓反入及卿大夫皆說
屨升就席公以賓及卿大夫皆坐乃安羞庶羞
大夫祭薦司正升受命皆命君曰無不醉賓及
卿大夫皆興對曰諾敢不醉皆反坐主人洗升
獻士于西階上士長升拜受饌主人拜受饌士
坐祭立飲不拜既爵其他不拜坐祭立飲乃薦
司正與射人一人司士一人執幕二人立于饌

南東上辯獻士士既獻者立于東方西面北上
乃薦士祝史小臣師亦就其位而薦之主人就
旅食之尊而獻之旅食不拜受爵坐祭立飲若
射則大射正爲司射如鄉射之禮賓降洗升媵
觚于公酌散下拜公降一等小臣辭賓升再拜
稽首公答再拜賓坐祭卒爵再拜稽首公答再
拜賓降洗象饌升酌膳坐奠于薦南降拜小臣
辭賓升成拜公答再拜賓反位公坐取賓所媵
饌興唯公所賜受者如初受酬之禮降更爵洗

升酌膳下拜小臣辭升成拜公答拜乃就席坐
行之有執爵者唯受于公者拜司正命執爵者
爵辯卒受者興以酬士大夫卒受者以爵興西
階上酬士士升大夫奠爵拜士答拜大夫立卒
爵不拜實之士拜受大夫拜送士旅于西階上
辯士旅酌卒主人洗升自西階獻庶子于阼階
上如獻士之禮辯降洗遂獻左右正與內小臣
皆於阼階上如獻庶子之禮無筭爵士也有執
膳爵者有執散爵者執膳爵者酌以進公公不

拜受執散爵者酌以之公命所賜所賜者興受
爵降席下奠爵再拜稽首公答拜受賜爵者以
爵就席坐公卒爵然後飲執膳爵者受公爵酌
反奠之受賜爵者興授執散爵者乃酌
行之唯受爵於公者拜卒受爵者興以酬士于
西階上士升大夫不拜乃飲實爵士不拜受爵
大夫就席士旅酌亦如之公有命徹冪則卿大
夫皆降西階下北面東上再拜稽首公命小臣
辭公答再拜大夫皆辟遂升反坐士終旅於上

如初無筭樂宵則庶子執燭於阼階上司宮執燭於西階上甸人執大燭於庭閽人爲大燭於門外賓醉北面坐取其薦脯以降奏陔賓所執脯以賜鐘人於門內雷遂出卿大夫皆出公不送公與客燕曰寡君有不腆之酒以請吾子之與寡君須臾焉使某也以請對曰寡君君之私也君無所辱賜于使臣臣敢辭寡君固曰不腆使其固以請寡君君之私也君無所辱賜于使臣臣敢固辭寡君固曰不腆使其固以請某固

辭不得命敢不從致命曰寡君使某有不腆之酒以請吾子之與寡君須臾焉君貺寡君多矣又辱賜于使臣臣敢拜賜命記燕朝服於寢其牲狗也亨于門外東方若與四方之賓燕則公迎之于大門內揖讓升賓爲苟敬席于阼階之西北面有胥不啻肺不啻酒其介爲賓無膳尊無膳爵與卿燕則大夫爲賓與大夫燕亦大夫爲賓羞膳者與執帛者皆士也羞卿者小膳宰也若以樂納賓則賓及庭奏肆夏賓拜酒主人

答拜而樂闋公拜受爵而奏肆夏公卒爵主人
升受爵以下而樂闋升歌鹿鳴下管新宮笙入
三成遂合鄉樂若舞則勺惟公與賓有俎獻公
曰臣敢奏爵以聽命凡公所辭皆栗階凡栗階
不過二等凡公所酬既拜請旅侍臣凡薦與羞
者小膳宰也有內羞君與射則爲下射袒朱襦
樂作而后就物小臣以巾授矢稍屬不以樂志
既發則小臣受弓以授弓人上射退于物一筈
既發則答君而俟若飲君燕則夾爵君在大夫
射則肉袒若與四方之賓燕媵爵曰臣受賜矣
臣請贊執爵者相者對曰吾子無自辱焉有房
中之樂

儀禮卷六

終

儀禮卷七

大射

君有命戒射宰戒百官有事於射者射人戒諸公卿大夫射司士戒士射與贊者前射三日宰夫戒宰及司馬射人宿視滌司馬命量人量侯道與所設之以狸步大侯九十參七十干五十設之各去其侯西十北十遂命量人巾車張三侯大侯之崇見鵠於參參見鵠於干干不及地武不繫左下綱設之西十北十凡之用革樂人

宿縣于阼階東笙磬西面其南笙鐘其南罇皆南陳建鼓在阼階西南鼓應鼗在其東南鼓西階之西頌磬東面其南鐘其南罇皆南陳一建鼓在其南東鼓朔鼗在其北一建鼓在西階之東南面蕩在建鼓之間鼗倚于頌磬西絃厥明司宮尊於東楹之西兩方壺膳尊兩甒在南有豐冪用錫若絺綴諸箭盖冪加勺又反之皆玄尊酒在北尊士旅食于西罇之南北面兩罍壺又尊于大侯之左東北兩壺獻酒設洗于阼階

東南罍水在東篚在洗西南陳設膳篚在其北西面又設洗于獲者之尊西北水在洗北篚在南東陳小臣設公席于阼階上西鄉司宮設賓席于戶西南面有加席卿席賓東東上小卿賓西東上大夫繼而東上若有東面者則北上席工于西階之東東上諸公阼階西北面東上官饌羨定射人告具于公公升卽位于席西鄉小臣師納諸公卿大夫諸公卿大夫皆入門右北面東上士西方東面北上大史在于侯之東北

儀禮卷之十一
北面東上士旅食者在士南北面東上小臣師
從者在東堂下南面西上公降立于阼階之東
南南鄉小臣師詔揖諸公卿大夫諸公卿大夫
西面北上揖大夫大夫皆少進大射正擯擯者
請賓公曰命其爲賓擯者命賓賓少進禮辭反
命又命之賓再拜稽首受命擯者反命賓出立
于門外北面公揖卿大夫升就席小臣自阼階
下北面請執冪者與羞膳者乃命執冪者執冪
者升自西階立于尊南北面東上膳宰請羞于

諸公卿者擯者納賓賓及庭公降一等揖賓賓
辭公升卽席奏肆夏賓升自西階主人從之賓
右北面至再拜賓答再拜主人降洗洗南西北
面賓降階西東面主人辭降賓對主人北面盥
坐取觚洗賓少進辭洗主人坐奠觚于篚與對
賓反位主人卒洗賓揖乃升夫升賓拜洗主人
賓右奠觚答拜降盥賓降主人辭降賓對卒盥
賓揖升主人升坐取觚執冪者舉冪主人酌膳
執冪者蓋冪酌者加勺又反之筵前獻賓賓西

儀禮 卷七
階上拜受爵于筵前反位主人賓右拜送爵宰
胥薦脯醢賓升筵庶子設折俎賓坐左執觚右
祭脯醢奠爵于薦右興取肺坐絕祭嚌之興加
于俎坐挽手執爵遂祭酒興席末坐啐酒降席
坐奠爵拜告旨執爵興主人答拜樂闋賓西階
上北面坐卒爵興坐奠爵拜執爵興主人答拜
賓以虛爵降主人降賓洗南西北面坐奠觚少
進辭降主人西階西東面少進對賓坐取觚奠
于篚下盥洗主人辭洗賓坐奠觚于篚興對卒

洗及階揖升主人升拜洗如賓禮賓降盥主人
降賓辭降卒盥揖升酌膳執帨如初以酢主人
于西階上主人北面拜受爵賓主人之左拜送
爵主人坐祭不啐酒不拜酒遂卒爵興坐奠爵
拜執爵興賓答拜主人不崇酒以虛爵降奠于
篚賓降立于西階西東面擯者以命升賓賓升
立于西序東面主人盥洗象觚升酌膳東北面
獻于公公拜受爵乃奏肆夏主人降自西階阼
階下北面拜送爵宰胥薦脯醢由左房庶子設

折俎升自西階公祭如賓禮庶子贊授肺不拜
酒立卒爵坐奠爵拜執爵興主人答拜樂闋升
受爵降奠于篚更爵洗升酌散以降酢于阼階
下北面坐奠爵再拜稽首公答拜主人坐祭
遂卒爵興坐奠爵再拜稽首公答拜主人奠爵
于篚主人盥洗升媵觚于賓酌散西階上坐奠
爵拜賓西階上北面答拜主人坐祭遂飲賓辭
卒爵興坐奠爵拜執爵興賓答拜主人降洗賓
降主人辭降賓辭洗卒洗賓揖升不拜洗主人

酌膳賓西階上拜受爵于筵前反位主人拜送
爵賓升席坐祭酒遂奠于薦東主人降復位賓
降筵西東南面立小臣自阼階下請媵爵者公
命長小臣作下大夫二人媵爵媵爵者阼階下
皆北面再拜稽首公答拜媵爵者立于洗南西
面北上序進盥洗角觶升自西階序進酌散交
于楹北降適阼階下皆奠觶再拜稽首執觶興
公答拜媵爵者皆坐祭遂卒觶興坐奠觶再拜
稽首執觶興公答再拜媵爵者執觶待于洗南

小臣請致者若命皆致則序進奠觶于篚阼階下皆北面再拜稽首公答拜媵爵者洗象觶升實之序進坐奠于薦南北上降適阼階下皆再拜稽首送觶公答拜媵爵者皆退反位公坐取大夫所媵觶興以酬賓賓降西階下再拜稽首小臣正辭賓升成拜公坐奠觶答拜執觶興公卒觶賓下拜小臣正辭賓升再拜稽首公坐奠觶答拜執觶興賓進受虛觶降奠于篚易觶興洗公有命則不易不洗反升酌膳下拜小臣正

辭賓升再拜稽首公答拜賓告于擯者請旅諸臣擯者告于公公許賓以旅大夫于西階上擯者作大夫長升受旅賓大夫之右坐奠觶拜執觶興大夫答拜賓坐祭立卒觶不拜若膳觶也則降更觶洗升實散大夫拜受賓拜送遂就席大夫辯受酬如受賓酬之禮不祭酒卒受者以虛觶降奠于篚復位主人洗觶升實散獻卿於西階上司宮兼卷重席設於賓左東上卿升拜受觶主人拜送觶卿辭重席司宮徹之乃薦脯

醢卿升席庶子設折俎卿坐左執爵右祭脯醢
奠爵于薦右興取肺坐絕祭不啐肺興加于俎
坐掬手取爵遂祭酒執爵興降席西階上北面
坐卒爵興坐奠爵拜執爵興主人答拜受爵卿
降復位辯獻卿主人以虛爵降奠于筐擯者升
卿卿皆升就席若有諸公則先卿獻之如獻卿
之禮席于阼階西北面東上無加席小臣又請
媵爵者二大夫媵爵如初請致者若命長致則
媵爵者奠觶于筐一人待于洗南長致者阼階

下再拜稽首公答拜洗象觶升實之坐奠于薦
南降與立于洗南者二人皆再拜稽首送觶公
答拜公又行一爵若賓若長唯公所賜以旅于
西階上如初大夫卒受者以虛觶降奠于筐主
人洗觶升獻大夫于西階上大夫升拜受觶主
人拜送觶大夫坐祭立卒爵不拜既爵主人受
爵大夫降復位胥薦主人于洗北西面脯醢無
胥辯獻大夫遂薦之繼賓以西東上若有東面
者則北上卒擯者升大夫大夫皆升就席乃席

工于西階上少東小臣納工工六人四瑟僕人
正徒相大師僕人師相少師僕人士相上工相
者皆左何瑟後首內弦挈越右手相後者徒相
入小樂正從之升自西階北面東上坐授瑟乃
降小樂正立于西階東乃歌鹿鳴三終主人洗
升實爵獻工工不興左瑟一人拜受爵主人西
階上拜送爵薦脯醢使人相祭率爵不拜主人
受虛爵衆工不拜受爵坐祭遂卒爵辯有脯醢
不祭主人受爵降奠于筐復位大師及少師上

工皆降立于鼓北羣工陪于後乃管新宮三終
卒管大師及少師上工皆東坳之東南西面北
上坐擯者自阼階下請立司正公許擯者遂爲
司正司正適洗洗角觶南面坐奠于中庭升東
楹之東受命于公西階上北面命賓諸公卿大
夫公曰以我安賓諸公卿大夫皆對曰諾敢不
安司正降自西階南面坐取觶升酌散降南面
坐奠觶興右還北面少立坐取觶興坐不祭卒
觶奠之興再拜稽首左還南面坐取觶洗南面

反奠于其所北面立司射適次袒決遂執弓挾
乘矢于弓外見鏃於弣右巨指鉤弦自阼階前
曰爲政請射遂告曰大夫與大夫士御於大夫
遂適西階前東面右顧命有司納射器射器皆
入君之弓矢適東堂賓之弓矢與中等豐皆止
于西堂下衆弓矢不挾總衆弓矢福皆適次而
俟工人士與梓人升自北階兩楹之間疏數容
弓若丹若墨度尺而午射正蒞之卒畫自北階
下司官埽所畫物自北階下太史俟于所設中

之西東面以聽政司射西面誓之曰公射大侯
大夫射參士射干射者非其侯中之不獲卑者
與尊者爲耦不異侯大史許諾遂比三耦三耦
俟于次北西面北上司射命上射曰某御於子
命下射曰子與某子射卒遂命三耦取弓矢於
次司射入于次摺三挾一个出于次西面揖當
階北面揖及階揖升堂揖當物北面揖及物揖
由下物少退誘射射三侯將乘矢始射干又射
參大侯再發卒射北面揖及階揖降如升射之

儀遂適堂西改取一个挾之遂取扑摺之以立于所設中之西南東面司馬師命負侯者執旌以負侯負侯者皆適侯執旌負侯而侯司射適次作上耦射司射反位上耦出次西面揖進上射在左並行當階北面揖及階揖上射先升三等下射從之中等上射升堂少左下射升上射揖並行皆當其物北面揖及物揖皆左足履物還視侯中合足而侯司馬正適次袒決遂執弓右挾之出升自西階適下物立于物間左執附

右執簫南揚弓命去侯負侯皆許諾以宮趨直西及乏南又諾以商至乏聲止授獲者退立于西方獲者與共而侯司馬正出于下射之南還其後降自西階遂適次釋弓說決拾襲反位司射進與司馬正交于階前相左由堂下西階之東北面視上射命曰毋射獲毋獵獲上射揖司射退反位乃射上射既發挾矢而后下射射拾發以將乘矢獲者坐而獲舉旌以宮偃旌以商獲而未釋獲卒射右挾之北面揖揖如升射上射

降三等下射少右從之中等並行上射於左與
升射者相左交于階前相揖適次釋弓說決拾
襲反位三耦卒射亦如之司射去扑倚于階西
適阼階下北面告于公曰三耦卒射反摺扑反
位司馬正袒決遂執弓右挾之出與司射交于
階前相左升自西階自右物之後立于物間西
南面揖弓命取矢負侯許諾如初去侯皆執旌
以負其侯而侯司馬正降自西階北面命設楅
小臣師設楅司馬正東面以弓爲畢既設楅司

馬正適次釋弓說決拾襲反位小臣坐委矢于
楅北括司馬師坐乘之卒若矢不備則司馬正
又袒執弓升命取矢如初曰取矢不索乃復求
矢加于楅卒司馬正進坐左右撫之興反位司
射適西階西倚扑升自西階東面請射于公公
許遂適西階上命賓御于公諸公卿則以耦
告于上大夫則降卽位而后告司射自西階上
北面告于大夫曰請降司射先降摺扑反位大
夫從之降適次立于三耦之南西面北上司射

東面于大夫之西北耦大夫與大夫命上射曰
某御於子命下射曰子與某子射卒遂比衆耦
衆耦立于大夫之南西面北上若有士與大夫
爲耦則以大夫之耦爲上命大夫之耦曰子與
某子射告於大夫曰某御於子命衆耦如命三
耦之辭諸公卿皆未降遂命三耦各與其耦拾
取矢皆袒決遂執弓右挾之一耦出西面揖當
楅北面揖及楅揖上射東面下射西面上射揖
進坐橫弓卻手自弓下取一个兼諸弣與順羽

且左還毋周反面揖下射進坐橫弓覆手自弓
上取一个兼諸弣與順羽且左還毋周反面揖
旣拾取矢耦之兼挾乘矢皆內還南面揖適楅
南皆左還北面揖楮三挾一个揖以耦左還上
射於左退者與進者相左相揖還退釋弓矢于
次說決拾襲反位二耦拾取矢亦如之後者遂
取誘射之矢兼乘矢而取之以授有司于次中
皆襲反位司射作射如初一耦揖升如初司馬
命去侯負侯許諾如初司馬降釋弓反位司射

儀禮 卷十
猶挾一个去扑與司馬交于階前適阼階下北面請釋獲于公公許反摺扑遂命釋獲者設中以弓爲畢北面太史釋獲小臣師執中先首坐設之東面退太史實八筭于中橫委其餘于中西興共而俟司射西面命曰中離維綱揚觸柎復公則釋獲衆則不與唯公所中中三侯皆獲釋獲者命小史小史命獲者司射遂進由堂下北面視上射命曰不貫不釋上射揖司射退反位釋獲者坐取中之八筭改實八筭興執而俟

乃射若中則釋獲者每一个釋一筭上射於右下射於左若有餘筭則反委之又取中之八筭改實八筭于中興執而俟三耦卒射賓降取弓矢于堂西諸公卿則適次繼三耦以南公將射則司馬師命負侯皆執其旌以負其侯而俟司馬師反位隸僕人埽侯道司射去扑適阼階下告射于公公許適西階東告于賓遂摺扑反位小射正一人取公之決拾於東坫上一小射正授弓拂弓皆以俟于東堂公將射則賓降適堂

西袒決遂執弓搯三挾一个升自西階先待于物北北一筈東面立司馬升命去侯如初還右乃降釋弓反位公就物小射正奉決拾以筈大射正執弓皆以從於物小射正坐奠筈于物南遂拂以巾取決興贊設決朱極三小臣正贊袒公袒朱襦卒袒小臣正退俟于東堂小射正又坐取拾興贊設拾以筈退奠于坫上復位大射正執弓以袂順左右隈上再下壹左執弣右執簫以授公公親揉之小臣師以巾內拂矢而授

矢于公稍屬大射正立于公後以矢行告于公下曰留上曰揚左右曰方公既發大射正受弓而俟拾發以將乘矢公卒射小臣師以巾退反位大射正受弓小射正以筈受決拾退奠于坫上復位大射正退反司正之位小臣正贊襲公還而後賓降釋弓于堂西反位于階西東面公卽席司正以命升賓賓升復筵而后卿大夫繼射諸公卿取弓矢于次中袒決遂執弓搯三挾一个出西面揖揖如三耦升射卒射降如三耦

儀禮 卷之七
適次釋弓說決拾襲反位衆皆繼射釋獲皆如
初卒射釋獲者遂以所執餘獲適阼階下北面
告于公曰左右卒射反位坐委餘獲于中西與
共而俟司馬袒執弓升命取矢如初負侯許諾
以旌負侯如初司馬降釋弓如初小臣委矢于
楅如初賓諸公卿大夫之矢皆異束之以茅卒
正坐左右撫之進束反位賓之矢則以授矢人
于西堂下司馬釋弓反位而后卿大夫升就席
司射適階西釋弓去扑襲進由中東立于中南

北面視筭釋獲者東面于中西坐先數右獲二
筭爲純一純以取實于左手十純則縮而委之
每委異之有餘純則橫諸下一筭爲竒竒則又
縮諸純下與自前適左東面坐坐兼斂筭實于
左手一純以委十則異之其餘如右獲司射復
位釋獲者遂進取賢獲執之由阼階下北面告于
公若右勝則曰右賢於左若左勝則曰左賢于
右以純數告若有竒者亦曰竒若左右鈞則左
右各執一筭以告曰左右鈞還復位坐兼斂筭

儀禮 卷七
實八筭于中委其餘于中西興共而俟司射命
設豐司宮士奉豐由西階升北面坐設于西楹
西降復位勝者之弟子洗觶升酌散南面坐奠
于豐上降反位司射遂袒執弓挾一个搯扑東面
于三耦之西命三耦及衆射者勝者皆袒決遂
執張弓不勝者皆襲說決拾卻左手右加弛弓
于其上遂以執弣司射先反位三耦及衆射者
皆升飲射爵于西階上小射正作升飲射爵者
如作射一耦出揖如升射及階勝者先升升堂

少右不勝者進北面坐取豐上之觶興少退立
卒觶進坐奠于豐下興揖不勝者先降與升飲
者相左交于階前相揖適次釋弓襲反位僕人
師繼酌射爵取觶實之反奠于豐上退俟于序
端升飲者如初三耦卒飲若賓諸公卿大夫不
勝則不降不執弓耦不升僕人師洗升實觶以
授賓諸公卿大夫受觶于席以降適西階上北
面立飲卒觶授執爵者反就席若飲公則侍射
者降洗角觶升酌散降拜公降一等小臣正辭

賓升再拜稽首公答再拜賓坐祭卒爵再拜稽
首公答再拜賓降洗象觶升酌膳以致下拜小
臣正辭升再拜稽首公答再拜公卒觶賓進受
觶降洗散觶升實散下拜小臣正辭升再拜稽
首公答再拜賓坐不祭卒觶降奠于篚階西東
面立擯者以命升賓賓升就席若諸公卿大夫
之耦不勝則亦執弛弓特升飲衆皆繼飲射爵
如三耦射爵辯乃徹豐與觶司宮尊侯于服不
之東北兩獻酒東面南上皆加勺設洗于尊西

北篚在南東肆實一散于篚司馬正洗散遂實
爵獻服不服不侯西北三步北面拜受爵司馬
正西面拜送爵反位宰夫有司薦庶子設折俎
卒錯獲者適右个薦俎從之獲者左執爵右祭
薦俎二手祭酒適左个祭如右个中亦如之卒
祭左个之西北三步東面設薦俎立卒爵司馬
師受虛爵洗獻隸僕人與巾車獲者皆如大侯
之禮卒司馬師受虛爵奠于篚獲者皆執其薦庶
子執俎從之設于乏少南服不復負侯而侯司

射適階西去扑適堂西釋弓說決拾襲適洗洗
觚升實之降獻釋獲者于其位少南薦脯醢折
俎皆有祭釋獲者薦右東面拜受爵司射北面
拜送爵釋獲者就其薦坐左執爵右祭脯醢與
取肺坐祭遂祭酒與司射之西北面立卒爵不
拜既爵司射受虛爵奠于篚釋獲者少西辟薦
反位司射適堂西袒決遂取弓挾一个適階西
搯扑以反位司射倚扑于階西適阼階下北面
請射于公如初反搯扑適次命三耦皆袒決遂

執弓序出取矢司射先反位三耦拾取矢如初
小射正作取矢如初三耦既拾取矢諸公卿大
夫皆降如初位與耦入於次皆袒決遂執弓皆
進當福進坐說矢束上射東面下射西面拾取
矢如三耦若士與大夫爲耦士東面大夫西面
大夫進坐說矢束退反位耦揖進坐兼取乘矢
興順羽且左還毋周反面揖大夫進坐亦兼取
乘矢如其耦北面搯三挾一个揖進大夫與其
耦皆適次釋弓說決拾襲反位諸公卿升就席

衆射者繼拾取矢皆如三耦遂入于次釋弓矢
說決拾襲反位司射猶挾一个以作射如初一
耦揖升如初司馬升命去侯負侯許諾司馬降
釋弓反位司射與司馬交于階前倚扑于階西
適阼階下北面請以樂于公公許司射反搯扑
東面命樂正曰命用樂樂正曰諾司射遂適堂
下北面眡上射命曰不鼓不釋上射揖司射退
反位樂正命大師曰奏狸首間若一大師不興
詩諾樂正反位奏狸首以射三耦卒射賓待于

物如初公樂作而后就物稍屬不以樂志其他
如初儀卒射如初賓就席諸公卿大夫衆射者
皆繼射釋獲如初卒射降反位釋獲者執餘獲
進告左右卒射如初司馬升命取矢負侯許諾
司馬降釋弓反位小臣委矢司馬師乘之皆如
初司射釋弓視筭如初釋獲者以賢獲與鈞告
如初復位司射命設豐實解如初遂命勝者執
張弓不勝者執弛弓升飲如初卒退豐與解如
初司射猶袒決遂左執弓右執一个兼諸弦面

備禮 卷七
鏃適次命拾取矢如初司射反位三耦及諸公
卿大夫衆射者皆袒決遂以拾取矢如初矢不
挾兼諸弦面鏃退適次皆授有司弓矢襲反位
卿大夫升就席司射適次釋弓說決拾去扑襲
反位司馬正命退福解綱小臣師退福巾車量
人解左下綱司馬師命獲者以旌與薦俎退司
射命釋獲者退中與筭而俟公又舉奠觶唯公
所賜若賓若長以旅于西階上如初大夫卒受
者以虛觶降奠于筐反位司馬正升自西階東

楹之東北面告于公請徹俎公許遂適西階上
北面告于賓賓北面取俎以出諸公卿取俎如
賓禮遂出授從者于門外大夫降復位庶子正
徹公俎降自阼階以東賓諸公卿皆入門東面
北上司正升賓賓諸公卿大夫皆說履升就席
公以賓及卿大夫皆坐乃安羞庶羞大夫祭薦
司正升受命皆命公曰衆無不醉賓及諸公卿
大夫皆興對曰諾敢不醉皆反位坐主人洗酌
獻士于西階上士長升拜受觶主人拜送士坐

祭立飲不拜既爵其他不拜坐祭立飲乃薦司
正與射人于觶南北面東上司正爲上辯獻士
士既獻者立于東方西面北上乃薦士祝史小
臣師亦就其位而薦之主人就士旅食之尊而
獻之旅食不拜受爵坐祭立飲主人執虛爵奠
于篚復位賓降洗升媵觶于公酌散下拜公降
一等小臣正辭賓升再拜稽首公答再拜賓坐
祭卒爵再拜稽首公答再拜賓降洗象觶升酌
膳坐奠于薦南降拜小臣正辭賓升成拜公答

拜反位公坐取賓所勝觶興唯公所賜受者如
初受酬之禮降更爵洗升酌膳下再拜稽首小
臣正辭升成拜公答拜乃就席坐行之有執爵
者唯受于公者拜司正命執爵者爵辯卒受者
興以酬士大夫卒受者以爵興西階上酬士士
升大夫奠爵拜士答拜大夫立卒爵不拜賓之
士拜受大夫拜送士旅于西階上辯士旅酌若
命曰復射則不獻庶子司射命射唯欲卿大夫
皆降再拜稽首公答拜壹發中三侯皆獲主人

洗升自西階獻庶子于阼階上如獻士之禮辯
獻降洗遂獻左右正與內小臣皆於阼階上如
獻庶子之禮無筭爵士也有執膳爵者有執散
爵者執膳爵者酌以進公公不拜受執散爵者
酌以之公命所賜所賜者興受爵降席下奠爵
再拜稽首公答再拜受賜爵者以爵就席坐公
卒爵然後飲執膳爵者受公爵酌反奠之受賜
者興授執散爵者執散爵者乃酌行之唯受于
公者拜卒爵者興以酬士于西階上士升大夫
不拜乃飲實爵士不拜受爵大夫就席士旅酌
亦如之公有命徹幕則賓及諸公卿大夫皆降
西階下北面東上再拜稽首公命小臣正辭公
答拜大夫皆辟升反位士終旅于上如初無筭
樂宵則庶子執燭於阼階上司官執燭於西階
上甸人執大燭於庭閽人爲燭於門外賓醉北
面坐取其薦脯以降奏陔賓所執脯以賜鍾人
于門內雷遂出卿大夫皆出公不送公入鷲

儀禮卷七終



Faint vertical text columns, likely bleed-through from the reverse side of the page, containing characters such as '大夫', '士', and '大夫'.

卷之四